

四庫全書

史部

欽定四庫全書

史部

欽定續通志卷四百八十七
九

編修臣謝振定覆勘

總校官原任侍講臣王燕緒

欽定四庫全書

欽定續通志卷四十八十七

列傳

元 四十一

特爾格齊

達春

塔喇齊

塔海特穆爾

科爾結

呼圖克

布爾噶蘇

伊勒濟呼濟哈雅

阿都齊

明安

呼魯蘇

實喇巴爾爾

徹爾

奇爾台

托音納爾

和尚蒙古

伊克台伊爾丹

托里哈雅

特爾格齊高昌人世居五城後徙京師祖達實有謀畧

太祖西征高昌國達實勸其主執贄稱臣以安其國太

祖班師諸王言於帝曰達實之子伊拉齊驍勇善戰每

思効順而未有機太祖即詔給驛馬迎與俱來甚器重之丙午從太祖西征以功得兼長四環衛之筆且齊壬辰從國兵討金戰功最多特爾格齊其長子也沉鷲有才嘗有擁兵叛者特爾格齊率族人與戰於魚兒樂時軍興簿檄繁急特爾格齊一以其國書識之無遺失者至元中擢德安府達魯噶齊適土人蔡知府者以衆叛特爾格齊率衆先登身被數創遂平之主將怒將屠其城特爾格齊勸止之城遂得全累官至婺州路達魯噶

齊所在咸著政績大德三年

原作大德已亥考元史惟中統前以甲子紀年大德

已亥乃成宗三年也今改歸畫一

卒贈榮國公諡簡肅子三人雅爾堅

雅里嘗使河南過汴鄭大疫雅爾堅雅里命所在村郭

構室廬備藥醫以畜病者由是軍民全活者衆為湖州

路達魯噶齊卒於官伊噶珠同知安陸府事巴扎同知

宣政院事孫九人海壽雅爾堅雅里子也世祖朝累官

杭州路達魯噶齊撫民有恩卒封范陽郡侯諡惠敏

達春保喇子也善騎射至元元年入侍世祖奏對多稱

旨四年給以察罕食邑賦稅之半七年授山東統軍使
鎮莒密膠沂郟宿即墨等城宋人不敢犯九年改僉
樞密院事數將兵下瀕淮堡畧地漣海降宋人蔣德勝
十年改僉淮西等處行樞密院事城正陽以扼淮海
諸州兵宋陳奕率兵撓其役達春選精銳日十數戰夾
遁去卒城正陽宋復造戰艦於六安欲攻正陽達春率
騎兵焚其艦又破宋兵於橫河口十一年授淮西行省
參知政事帥師攻安豐廬壽等州俘生口萬餘宋夏貴

帥舟師十萬圍正陽帝遣達春往救之遇宋兵攻潁乃
急徙民入城伏兵以待是夜宋人焚北關達春率衆從
暗中射之宋軍退至沙河大破之遂長驅直走正陽與
右丞安塔哈分帥銳師渡淮至中流皆殊死戰宋軍大
潰遂解正陽之圍十二年從丞相巴延與宋軍戰宋軍
大潰其臣賈似道奔揚州遂分兵四出克池州取太平
順流東下至建康丹徒江陰常州皆望風迎降時揚州
未附謀告揚州人將夜襲丹徒達春設伏以待揚州軍

果夜至扼西津邀擊之殺獲甚衆授淮東左副都元帥
十三年參知政事領淮西行中書省事撫瘡痍備姦宄
境內帖然俄遷江西都元帥征廣東所至溪峒納款廣
東遂平十四年為江西宣慰使宋益王昞廣王昺走保
嶺海復改江西宣慰使為行中書省授達春中書左丞
行中書省事十五年帝命張弘範李恒總兵進討達春
留後以供軍費瑞州張公明愬左丞呂師夔謀為不軌
達春廉知其誣乃斬公明而後聞帝是之十七年入覲

以疾卒於京師時年三十七妻明埒氏以貞節稱二子長咱雅襲次必咱雅仕至征東行省左丞妻伯雅爾泰安郡武穆王博囉罕之女亦有賢行

塔喇齊喀喇人其父伊里布太祖時以武功授帳前總校奉旨南征至洛陽遂家焉塔喇齊幼穎異好讀書尤善騎射襲父職參佐戎幕調度軍馬動合事宜行省奏充斷事官時南北民戶主客良賤雜揉蒙古軍牧馬草地互相占據命塔喇齊至其地理之軍民各得其所世

祖知其能俾領蒙古軍圍樊襄所向摧陷從丞相已延渡
江駐臨安尋命分路追襲宋二王塔喇齊領軍至福建
所過秋毫無犯降者如歸遷福建招討使時陳弔眼作
亂陷漳州塔喇齊生擒之戮於市餘黨悉平繼從征交
趾擊敗黃聖許等積功進廣西兩江道宣慰使都元帥
賀州盜起復討平之改福建宣慰使又改浙東金瘡發
卒追封臨安郡公子二人托克托穆爾邵武汀州新軍
萬戶府達魯噶齊萬努廣西宣慰使都元帥

塔海特穆爾塔塔爾岱人其先在太祖時從攻陝右征河西滅金皆有功曾祖特穆爾克從都元帥塔海幹布征蜀死於興元祖扎拉岱嗣扎拉岱卒父拜達勒尚幼從祖扎里達珠相繼襲職扎里從征蜀破宋軍於巴州達珠以西川行樞密院檄領兵救礪門大敗宋軍拜達勒既長以父官從行省伊蘇岱爾征建都死軍中塔海特穆爾襲父職初從行院呼敦圍嘉定嘉定降進圍重慶敗守將張珏兵至元十五年

原傳脫至元二字
今據世祖紀增

破宋

軍於白水江升管軍總管從征亦奚不薛又從征都掌
蠻皆為先鋒殺獲甚衆九溪蠻散猫大盤蠻尚木的世
用等叛從行省竒爾濟蘇討擒之伊蘇岱爾雅爾哈率
兵討烏蒙蠻其酋長阿蒙奔麻布蠻地塔海特穆爾追
至山箐中擒之以歸二十六年又從伊蘇岱爾西征不
知所終

科爾結蘇特氏憲宗時與父布達喇實俱直宿衛世祖
時科爾結以百戶從元帥阿珠伐宋有功命充大宗正

府伊克扎爾古齊領阿蘇軍從征海都有功師還成宗命宣撫湖廣等處至大元年武宗命充左衛阿蘇親軍都指揮使四年卒子特們德爾從征納顏有功襲父職子實沙事武宗仁宗直宿衛天歷元年從戰宜興郤敵兵一十三處以功授左阿蘇衛都指揮使

呼圖克蒙古烏魯克台氏父巴罕事太祖備宿衛至太宗時為鎮西行省領蒙古漢軍從攻河中潼關河南歲乙未授左手萬戶從都元帥塔海幹布出征卒軍中憲

宗命呼圖克將其軍從都元帥達勒達攻巴州又從都元帥釋埒渡馬湖江破宋叙州兵於老君山下中統元年宋將以舟師犯成都新津呼圖克擊敗之至元元年授蒙古漢軍總管二年從都元帥伯嘉努敗宋將夏貴於淮安五年卒子扎呼岱時在宿衛弟呼爾敦達哩襲其職呼爾敦達哩卒扎呼岱嗣為千戶從行樞密院圍重慶敗守將張珏軍進圍瀘州登城與瀘兵搏戰死子

阿都齊嗣

布爾噶蘇托克托台氏世祖時直宿衛扈駕征哈喇章
還帝駐蹕高阜見河北有駕舟來者顧左右曰是賊也
奈何布爾噶蘇曰臣請禦之即解衣徑渡揮戈刺死舟
尾二人拏其舟就岸舟中之人倉皇失措帝命左右悉
擒之哈喇章平以功論賞子塔塔古爾從征伯克有功
由宿衛升齊齊克齊拉袞千戶所達魯噶齊從征叛王
納顏額布根等擒額布根收其所管欽察之民武宗時
進元帥卒

伊勒濟呼濟哈雅輝和爾人從憲宗征釣魚山奉命修
麴藥以療師疫繼從皇孫蒙格圖征雲南戰數勝中統
三年呼圖克暨達哩叛領兵討平之至元十二年授隴
右河西道按察使烏魯斯和爾實雅謀亂從皇子安西

王

按原傳上作太子蒙格圖此作皇太子安西王考世
系表蒙格圖為太祖之孫安西王為世祖第三子皆

未嘗立為太子
子今並改正

往鎮之十五年與布色岱平圖魯二十年

進四川等處行中書省參知政事尋以疾歸秦州大德
八年卒至順中追封威寧郡公諡襄靖

阿都齊阿蘇特氏父哈噶斯憲宗時為萬戶阿都齊扈從憲宗南征與敵兵戰於劍州以功受賞額埒布格叛從伊聶濟等征之復有功世祖中統三年從征李壇身二十餘戰累功授千戶丞相巴延平章阿珠之平江南也阿都齊皆在行中著戰功歿於陳帝憐之賜鎮巢民一千五百餘戶命其子拜達勒襲職拜達勒從伯奇里克默色北征以功進後衛都指揮使兼右阿蘇衛事將阿蘇軍往征巴實伯里累戰累捷子烏魯斯天歷元年

諭降上都軍為本衛都指揮使

明安喀喇氏至元十三年世祖詔民之蕩析離居及僧道漏籍諸色人不當差徭者充桂齊令明安領之克勤於事二十年授中衛親軍都指揮使明年領桂齊軍北征又明年立桂齊親軍都指揮使司命為本衛達魯噶齊尋奉旨領蒙古軍北征與海都軍戰有功二十六年巴齊爾叛劫取官站托克托和斯塔喇海等明安率眾追擊悉還之至杭愛強民庫庫台錫里德克台等率眾

作亂又擊敗之二十七年博索瑪勒當珊伯奇實克綽
綽班駙馬烏哲台多羅台烏蘭岱爾塔里雅齊等掠四
集賽牛馬牧及劫默呼太子實保齊并鄂托克本布各
投下民殆盡明安追擊於昂吉實保齊之城悉還所掠
以歸二十九年巴實伯里哈實盜起奉詔以兵討之明
安設方畧與戰大敗之大德二年復將兵北征與海都
戰七年歿於軍子曰特爾格台曰布呼齊特爾格台終
平章政事子曰布延呼喇桂齊親軍都指揮使司達魯噶

齊次沙卜珠初直宿衛累升僉中衛親軍都指揮使司
事天曆元年從丞相雅克特穆爾禦敵檀州等處又率
其家人與遼軍戰却其軍俘八十四人以歸布埒齊積
官大尉子桑烏遜中衛親軍都指揮使

呼魯蘇巴里勒都氏曾祖博勒和罕扎事太祖從平諸
國克巴勒喇實千戶以其軍與達實衮等戰重傷墜馬
帝親勒兵救之升萬戶俾直宿衛祖蘇爾台年十五以
勇畧稱從憲宗定欽察為千戶領兵下西番從世祖伐

宋敗宋兵於亳州父昂吉爾岱初為軍器監官從世祖
征額呼布格有功俄奉使西域籍地產悉得其實帝方
欲大用之而卒呼魯蘇初直宿衛後以千戶從征納顏
衝擊敵營身被三十三創以功聞世祖命領太府監從
皇子庫庫楚出征還留鎮軍中後從成宗與海都勒斡
等戰有功成宗命為翰林承旨俄改萬戶與叛王烏魯
斯徹伯爾等戰以功授司徒子雅克布琳初奉興聖太
后旨充千戶俄改萬戶代父職尋罷歸所受印符於有

司仍直宿衛致和元年在上都謀迎文宗會同事者見
執乃率其屬奔還大都特命為通政院使天歷元年同
丞相雅克特穆爾敗旺沁等兵於紅橋又戰於白浮又
戰於昌平又戰於石槽帝嘉其功拜知樞密院事

實喇巴圖爾阿蘇特氏父伊勒達穆憲宗時領阿蘇特
十人入覲充阿都齊從世祖至哈喇之地戰數勝後以
金瘡發卒實喇巴圖爾至元十一年

原誤作二十一年今改正

從巴

延南征有功仍充阿都齊二十四年管阿蘇軍千戶納

顏叛從諸王和約爾征之力戰有功二十五年進尚乘
寺少卿征吉爾丹等敗之成宗嘉其功益軍二千命討
叛王托克托擒之大德六年卒子諾海齊襲

徹爾阿蘇特氏父拜哲伯在憲宗時從攻釣魚山以功
受賞徹爾事世祖充和爾齊從征海都奮勇擊其前鋒
後從征杭愛獲其牛馬畜牧悉以給軍食帝嘉之成宗
時盜據博羅塔拉地命將兵討之獲三千餘人誅其酋
長至大二年授左阿蘇衛僉事皇慶二年從湘寧王北

征亦有功子實勤們直宿衛至和元年從知院托克托
穆爾至潮河川獲鄂勒哲巴圖爾阿達奇等十二人復
於宜興遇實喇奈瑪台等迎戰奮戈擊死二人天曆元
年從擊圖們岱爾殺其四人從戰薊州殺其四人又追
殺十二人於檀子山以功授左衛阿蘇親軍都指揮使

司僉事

哥爾台察克台氏至元中

按世祖紀及托克托呼傳至元十四年錫里濟叛二十四

年納顏叛原文統作二十四年誤令改正

為欽察衛百戶從托克托呼征叛王

錫里濟及納顏有功升千戶從征呼喇珠戰於阿勒台之地元貞二年以疾卒子哈扎爾齊襲職從綽和爾與哈當阿戰有功大德五年從戰杭愛從武宗親征哈喇岱復從綽和爾征巴拜布琳為前鋒皇慶二年授千戶明宗居潛邸延祐四年命從西征與阿穆爾特穆爾戰於實喇塔拉默色之地復有功天歷二年授同知大都督府事卒

托音納爾塔塔喇氏世祖時從征納顏有功大德七年

授欽察衛親軍千戶所達魯噶齊八年改太僕少卿至
治間累官至通政使致和元年分院上都為都爾蘇所
殺文宗即位追封冀國公諡忠景子昂通襲父職濟爾
噶朗積官通政院使

和尚蒙古奈曼氏祖海蘇克實勒們千戶所蒙古軍百
戶伯父烏魯斯布哈初充蒙古軍五十戶至元七年從
南征以功命權百戶又從攻樊城攻新城攻鄂攻處州
屢立戰功二十五年授後衛親軍百戶卒父察爾哥襲

察爾奇卒和尚襲至大三年進後衛親軍副千戶延祐
三年江蘇寧都寇起從元帥奇珠討之生擒賊首誅之
致和元年西安王以兵討都爾蘇命從丞相雅克特穆
爾擒額卜德呼勒分兵備禦天歷元年從戰通州奮紅
橋又戰於白浮戰於昌平栗園戰於石槽又從擊圖們
岱爾於檀州所向皆有功命領八衛總把金鼓都鎮撫
司事

伊克台伊爾丹字太初回回氏父伊斯瑪音仕至大都

南北兩城兵馬都指揮使伊克台伊爾丹幼穎悟嗜學
讀書過目不忘尤工其國字語初為中書掾積官至刑
部員外郎四方所上獄反復披閱多所平反尋升中書
右司郎中嘗與同列議獄不合曰公等讀律不能通變
譬之醫者熟於方論而不切脈於疾奚益哉識者服為
名言大德八年肆赦廷議官吏受賕者不預伊克台伊
爾丹曰恩如雨露萬物均被賊吏固可嫉比之盜賊則
有間宥盜而不宥吏何耶刑部嘗有獄事上讞失實丞

相將譴右司主者伊克台伊爾丹初未嘗署其案至是
竊署其名於下或訝之荅曰吾偶不署此案耳豈有與
諸君同事而獨幸免哉丞相聞而賢之同列因獲免遷
左司郎中時左司闕都事平章梁溫都爾謂曰公當以
所知舉遂以王毅李廸為言一時輿論莫不稱允又嘗
論朝士如王仁卿賈元播高彥敬敬威卿李清臣輩可
大用時諸公處下僚後皆如其言遷翰林侍講學士知
制誥兼修國史轉集賢大學士未幾除江東建康道肅

政廉訪使監憲一年賊吏削跡至大初立尚書省復改
立中書省兩拜參議省事皆以疾辭延祐元年卒

托里哈雅輝和爾氏世居巴實伯里地曾祖庫克布色
埒齊當太祖西征導其生伊都呼迎降帝欲官之辭以不敏
祖巴喇珠始徙真定仕至帥府鎮撫富而樂施人稱為
長者父齊哩克齊性純正知讀書托里哈雅幼嗜學警
敏絕人喜從文士游由中書宣使出為寧晉主簿改隆
平縣達魯噶齊均賦興學劭農平訟橋梁水防備荒之

政無一不舉遷監察御史時江西胡參政殺其弟訟久
不決托里哈雅一訊竟伏其辜出僉燕南道肅政廉訪
司事務存大體不事苛察在任六年黜汙吏百四十有
奇召為戶部郎中仁宗在東宮知其嗜學出祕府經藉
及聖賢圖像以賜時人榮之母霍氏卒哀毀骨立起為
吏部尚書量能叙爵以平允稱改禮部尚書領會通館
事進荆湖北道宣慰使適峽人艱食發廩賑之而後聞
朝議避之至治三年遷淮東宣慰使卒於廣陵追封恒

山郡公弟觀音努廉明材幹亦仕至清顯云

欽定續通志卷四百八十七

欽定四庫全書

欽定續通志卷四百八十八

列傳

元 四十二

哈喇哈斯

阿實克布哈

拜珠

察罕

齊蘓

哈喇哈斯威喇諾爾氏曾祖奇爾實勒始事王汗托果

琳王汗與太祖約為兄弟及太祖得衆陰忌之謀害太祖竒爾實勒潛以其謀來告太祖與二十餘人遁去諸部多歸之還攻滅王汗併其衆擢竒爾實勒為千戶賜號達爾罕從平河西西域諸國祖巴哩察太宗時從太弟睿宗攻河南取汴蔡滅金賜順德以為分邑父囊嘉特從憲宗伐蜀卒于軍哈喇哈斯善騎射工國書又雅重儒術至元九年世祖命掌宿衛襲號達爾罕自是人稱達爾罕而不名

按劉敏中撰勲德碑云從世祖北巡平宗王亂率三百騎猝與敵遇整騎

突出敵背連殺矢殪數人敵
披靡遁帝壯之本傳不載

二十二年拜大宗正用法

平允審錄冤滯所活數百人二十八年拜湖廣行省平
章政事時江湖間多盜至則發卒悉擒誅之道途始無
梗初樞密置行院於各省分兵民為二奸人植黨自蔽
後因入覲極陳其不便帝罷之三十年平章劉國傑將
兵征交趾哈喇哈斯戒將吏無擾民軍中肅然俄有旨
發湖湘富民屯田廣西以圖交趾哈喇哈斯密遣使奏
止之民皆感悅及廣西元帥府請募南丹五千戶屯田

事上行省哈喇哈斯曰此土著之民誠為便之即命度地立為五屯統以屯長分牛種農具與之大德二年入朝上都拜江浙行省左丞相視政七日徵拜中書左丞相一以節用愛民為務有大政事必引儒臣雜議奏建廟學選名儒為學官采近臣子弟入學又集羣議建南郊為一代定制五年同列有以雲南行省左丞劉深計倡議請征八百媳婦國哈喇哈斯言山嶠小夷可諭之使來不足以煩中國不聽發兵二萬命深將以往師次

順元蛇節舉兵圍之窮谷事聞遣平章劉國傑往援擒
斬蛇節士卒存者纔十一二訖無成功帝始悔不用其
言七年進中書右丞相精選守令定官吏贓罪十二章
及丁憂婚聘盜賊等制禁獻戶及山澤之利每車駕幸
上都必令留守京師時帝弗豫制出中宮羣邪黨附哈
喇哈斯以身匡之

按布爾魯罕后傳云成宗多疾后居
中用事信任相臣哈喇哈斯與此互

異

天下晏然十年加開府儀同三司監修國史置僚屬
十一年成宗崩時武宗撫軍北邊仁宗侍太后在懷慶

諸奸臣謀斷北道請成后垂簾聽政立安西王阿南達
哈喇哈斯密遣使北迎武宗南迎仁宗悉收京城百司
符印封府庫稱疾卧闕下文書皆不署衆欲害之未敢
發及仁宗至近郊衆猶未知三月朔列牘請署后決以
三月三日御殿聽政乃立署之衆大喜迎仁宗入執左
丞相阿固台及安西王阿南達等就誅內難悉平武宗
至自北即皇帝位拜太傅錄軍國重事仍總百揆以其
子托歡入侍初仁宗之入也阿固台有勇力人莫敢近

諸王圖喇實手縛之以功封越王以慶元路為其食邑
哈喇哈斯謂非祖宗之制力爭之帝不聽圖喇因譖其
與安西王通謀由是罷相詔以太傅右丞相行和琳省
事至鎮斬為盜者一人分遣使者賑恤降戶度地置內
倉積粟以待來者浚古渠溉田數千頃治屯田教部落
雜耕其間北邊大治至大元年卒詔歸葬昌平追封順
德王謚忠獻子托歡由太子賓客拜御史中丞襲號達
爾罕累官左丞相重厚有父風喜讀書為政不尚苛暴

致和元年卒于官

阿實克布哈喀喇國王族也初太祖拔喀喇其祖母滅密古瑪爾氏新寡有二子曰庫魯克雅雅皆幼而國亂家破無所依遂越數國至京師時太祖已崩太宗立深異之命治邸舍具廩餼以居焉庫魯克無子雅雅後封康國王生六子阿實克布哈最賢年十四入侍世祖世祖賜土田給奴隸使居興和之天成至元二十四年納顏叛諸王諾延等皆應之帝問計對曰先撫安諸王乃

行天討則叛者勢自孤矣帝曰善即使北說諾延諾延
悅於是諸王之謀皆解帝乃議親征命徵兵遼陽以千
戶帥實保齊之衆從行遂平納顏三十年海都叛成宗
以皇孫撫軍於北阿實克布哈從行踰金山戰杭愛有
功成宗即位會大宗正扎爾古齊都爾蕪以賊污聞詔
鞠問之伏罪就命代之有訴朱清張瑄陰私既抵罪帝
遣兵馬都指揮使呼喇珠籍其家以受賂誅更命阿實
克布哈往具以實聞命兼兩城兵馬都指揮使事武宗

時為懷寧王總軍漠北問材可大用者即以母弟托克托對遂命從行後果為名臣成宗崩安西王阿南達乘間謀繼大統成后及丞相阿固台諸王穆爾特穆爾皆陰為之助時武宗猶在北邊太后及仁宗亦在懷孟未至適武宗遣托克托計事京師丞相哈喇哈斯令急還報武宗而成后已密諭通政使濟爾噶朗止其驛馬阿實克布哈知事急與同知通政院事察納謀作先日署文書給馬去濟爾噶朗聞托克托已去詰吏閱案牘乃

止太后及仁宗既至京師安西王謀以三月三日偽賀
仁宗千秋節因以舉事阿實克布哈言于哈喇哈斯請
先發制人乃前二日白仁宗詐稱武宗遣使召安西王
計事至即執送上都盡誅阿固台以下諸姦臣與哈喇
哈斯皆居禁中仁宗以太子監國遣使北迎武宗而武
宗遲迴不進太后曰非阿實克布哈往不可乃往至野
馬川見武宗備道兩宮意及陳安西王謀變始末且言
太子監國所以備他變臣萬死保其無他武宗悅拜中

書平章政事軍國大事並聽決裁因奏平內難之有功者音扎噶以下十人為兵馬指揮及直省舍人詔先還報兩宮仁宗即日率羣臣出迎武宗入上都加阿實克布哈特進太尉依前平章政事命與丞相塔斯布哈還京師治安西王黨諸連坐囊嘉特等三十餘人皆釋之嘗有近臣蹴鞠帝前帝命賜鈔十五萬貫阿實克布哈頓首進諫曰以蹴鞠受上賞則奇技淫巧之人日進而賢者日退矣死不敢奉詔乃止帝又嘗御五花殿阿實克

布哈見帝容色日悴乃進曰陛下不思祖宗倚託之重
天下仰望之切而惟麩蕪是沉姬嬪是好是猶兩斧伐
孤樹未有不顛仆者也陛下縱不自愛如宗社何帝大
悅曰非卿孰為朕言因命進酒又頓首謝曰臣方欲陛
下節飲而反勸之是臣言不信於陛下也左右皆賀帝
得直臣遂進中書左丞相行御史大夫俄復平章政事
錄軍國重事封康國公遷知樞密院事至大二年卒至
正元年追封順寧王謚忠烈子巴扎納廉直剛敏嘗為

京尹有誣海商百餘人為盜者獄具械送刑部巴扎納
審得其寃狀白丞相釋之後遷翰林侍讀學士

拜珠安圖孫也五歲而孤母教養之稍長宏遠端亮有
祖風至大二年襲為宿衛長仁宗朝遷太常禮儀院使
進大司徒每議大政必求合典故同官或譏之笑曰公
試言之國朝何事不依典故同官不能對每退食必延
儒士諮訪古今禮樂刑政治亂得失晝日不倦英宗在
東宮問宿衛之臣於左右咸稱拜珠賢遣召之辭不往

英宗登極拜中書平章政事宣徽使竇勒們約蘇穆爾
妻伊埒扎巴等謀為逆帝密得其事御穆清閣召拜珠
謀之對曰此輩擅權亂政謀危社稷宜速施天威以正
祖宗法度帝即命率衛士擒斬之其黨皆伏誅拜中書
左丞相先時近侍傳旨以姓名赴中書銓注者六七百
員選曹為之壅滯拜珠奏閣之注授一依選格次第吏
無容姦刑曹事有可矜者寬恕之貪暴不法必不少容
至治元年帝欲於元夕張燈設宴時居先帝喪參議張

養浩上疏拜珠謂當進諫即袖其疏入奏帝悅而止從
幸上都帝欲廣行宮亨麗殿奏曰陛下初登大寶不求
民瘼遂興大役恐失民望從之延祐間朔漠大風雪人
民流散以子女鬻人為奴婢拜珠以興王根本之地宜
加賑恤以立宗仁衛命縣官贖至衛中以遂生養至元
十四年始建太廟于大都至是四十年親享之禮未暇
講肆拜珠奏曰古云禮樂百年而後興郊廟祭享此其時
矣帝悅預敕有司以親享太室儀注禮節一遵典故始

有事于太廟二年春享始備法駕拜珠設太尉以從致齋大次行酌獻禮百年廢典一旦復見拜珠率百僚稱賀又奏建太廟前殿議行祫禘配享等禮帝悉從之時右丞相特們德爾貪濫譎險屢殺大臣鬻獄賣官廣立朋黨惡平章王毅右丞高昉因在京諸倉糧儲失陷欲奏誅之拜珠密言於帝俱得不死特們德爾復引參知政事張思明為左丞以助己忌拜珠方正謀中害之左右得其情以告拜珠曰大臣協和國之利也今以右相

讐我求報之非特吾二人之不幸亦國家之不幸吾知盡吾心而已死生禍福天實鑒之未幾奉旨往立忠

憲王碑于范陽

按富珠哩神駐蹕頌云至治元年詔曰丞相安圖功在社稷其敕詞臣即范陽

米地碑之明年帝幸易州駐蹕碑垣之南步自帳殿生碑右拜珠獻萬壽觴良久乃去史傳從畧附識于此

特們德爾久稱疾聞拜珠行將出莅省事帝遣燕燕賜之酒且曰卿年老自宜愛待新年入朝未晚遂怏怏而還然其黨猶布列朝中以拜珠故不得大肆其奸百計傾之終不能遂拜珠每以學校政化大源主者不務盡

心遂致廢弛請令內外官議拯治之有言佛教可治天下者帝問之對曰清淨寂滅可自治耳若治天下捨仁義則綱常亂矣帝善之奏名張思明詣上都數其罪杖而逐之特們德爾繼亦病卒旋進右丞相監修國史帝欲爵以三公懇辭遂不置左相獨任以政首薦張珪復平章政事召用致仕老臣優其祿秩日以進賢退不肖為務三年將進仁宗實錄先一日詣翰林國史院聽讀首卷大德十一年事不書右丞相

原文執作左丞相今依哈喇哈斯傳改正

哈喇哈斯定策功惟書越王圖喇勇決從容謂史官曰
無右丞相雖百越王何益立命書之其他未盡善者一
一正之人服其識拜珠以海運糧視世祖時頓增數倍
今江南民力困極而京倉充滿奏請歲減二十萬石帝
遂併特們德爾所增江淮糧免之時特們德爾過惡日
彰拜珠以聞帝悟奪其官仆其碑奸黨特克實等甚懼
帝在上都夜寐不寧命作佛事拜珠諫止之既而懼誅者
復陰誘羣僧言國當有厄非作佛事而大赦無以禳之

拜珠叱曰爾輩欲圖金帛又欲庇有罪耶奸黨益懼乃
生異謀晉王伊蘇特穆爾時鎮北邊特克實潛遣人告
以逆謀約事成推王為帝王命囚之遣使赴上都告變
未至車駕南還次南坡特克實與齊勒特穆爾等夜以
所領阿蘓衛兵為外應殺拜珠遂弑帝於行幄晉王即
位特實克等伏誅詔有司備儀衛百官者宿前導輿拜
珠畫相於海雲寺大作佛事觀者無不泣下拜珠憂國
忘家知無不言自入相後振立紀綱修舉廢墜裁不急

之務杜僥倖之門加惠兵民輕徭薄斂英宗倚之相與勵精圖治天下晏然而姦臣畏之卒構禍難母竒味氏年二十二寡居守節初拜珠為太常禮儀院使吏就第請署字適閱羣戲出稍後母厲聲呵曰官事不治若爾所為豈大人事耶拜珠深自克責一日侍宴醉歸母戒之曰天子試汝量故強汝飲汝當益戒無酣于酒又常代祀睿宗原廟歸母問曰真定官府待汝若何對曰厚甚母曰彼以天子威靈汝先世勲德故耳汝何有焉拜

珠之賢母之教也後封東平王夫人泰定初退封拜珠
東平王謚忠獻子都稜特穆爾

察罕西域巴喇勒哈城人父博多納國兵下西域舉族
來歸事親王實喇授河東民賦副總管因居河中猗氏
縣後徙解州贈芮國公察罕魁偉穎悟博覽強記通諸
國字書為行軍府鄂囉千戶鄂囉齊參政湖廣辟為蒙
古都萬戶府知事鄂囉齊進平章復辟為理問政事悉
委裁決且令諸子受學至元二十四年從鎮南王征安

南安南世子遣其叔父詣軍門自陳無罪王命察罕數其罪使者辭屈世子舉衆逃去二十八年授樞密院經歷未幾從鄂囉齊移治江西成宗大德四年御史臺奏僉湖南憲司事中書省奏為武昌路治中丞相哈喇哈斯曰察罕廉潔固宜居風憲然武昌大都非斯人不可竟除武昌廣西妖賊高仙道以左道惑衆平民誣誤者數千計既敗湖廣行省命察罕與憲司雜治之鞠得其情誅首惡數人餘悉縱遣之以治最聞擢河南行省郎

中成宗崩仁宗自藩邸入誅羣奸迎武宗于邊河南平章囊嘉特薦察罕即驛召至上都武宗即位立仁宗為皇太子授察罕詹事院判進僉詹事院事至大元年閱戶口江南諸省還進太子府正加昭文館大學士遷家令仁宗即位拜中書參知政事總持綱維不屑細務識者謂得大臣體帝嘗稱其清素前後賞賚甚厚皇慶元年進平章政事商議中書省事乞歸解州立碑先塋許之居德安白雲山別墅以白雲自號嘗入見帝望見曰

白雲先生來也其被寵遇如此察罕嘗譯貞觀政要以獻帝大悅詔繕寫徧賜左右且詔譯帝範又命譯托卜齊延名曰聖武開天紀及紀年纂要太宗平金始末等書俱付史館嘗以病請告暨還朝入謝帝曰知止不辱今見其人又語及前古賜姓命氏之事因賜察罕姓白氏察罕天性孝友田宅之在河中者悉分與諸昆弟昆弟貧來歸者復分與田宅奴婢故人多稱長者既致仕優游八年以壽終子外嘉努武岡路總管理嘉努早卒

胡土克圖高郵府判官孫九人仕者二人庫庫布哈哈
克繖

齊蘓西土人曾祖塔布台祖阿勒達爾台父濟爾噶台
世贈功臣追封王爵齊蘓七歲失怙恃既壯沈密靜專
為徽仁裕聖皇太后宮臣仁宗幼時齊蘓左右擁翼入
則佐視食飲出則抱負遊行鞠躬盡力大德三年武宗
總戎北邊九年讒人亂國仁宗侍皇太后之國于懷未
幾復之雲中連年奔走齊蘓無倦色成宗崩仁宗奉太

后入朝殲姦黨迎武宗即皇帝位仁宗為皇太子拜齊
蘇平章政事行大司農累官至太保錄軍國重事集賢
大學士兼大司農封應國公以疾卒于位子二人長巴
圖官右丞子耀珠次拜特穆爾官大都留守兼少府監
武衛親軍都指揮使子鄂勒哲圖曼濟

欽定續通志卷四百八十八

欽定四庫全書

欽定續通志卷四百八十九

列傳

元 四十三

張珪

李孟

張養浩

敬儼

張珪字公端弘範之子也至元十六年弘範平廣海宋禮部侍郎鄧光薦將赴水死弘範救而禮之命珪受學

按虞集撰珪墓誌叙此於平諸盜之後云軍中無事得宋禮部侍郎鄧光薦而師事與傳互異光薦嘗

遺一編書目曰相業語珪曰熟此後必賴其用十七年授管軍萬戶鎮建康奏曰臣年幼軍事重有聶禎者從臣父祖久歷行陣幸以副臣帝歎曰求老成自副常兒不知出此厚賜而遣之十九年太平宣徽盜起行省檄珪討之士卒數為賊敗卒有殺民家丞而并傷其主者

珪曰此軍所以敗也斬其卒悉平諸盜

案虞集撰蒙誌云盜起燕湖宣

欽報至珪投衣而起率步卒先定蕪湖使言於行省行省因以討賊屬之戰屢勝乃遣人撫安餘民有他賊將襲珪珪夜伏兵山上明日賊走山伏起蹴墮崖死宣州平賊之寇徽者特南岳西坑二寨為險固珪先令壯士

綠鳥道登其巢背乃奮兵擊賊賊出戰巢背軍下據其
壁賊回顧賊愕遁去因追擒其渠送行省戮之徽州亦

平謹

識 二十九年入朝命為樞密副使太傅伊魯勒諾延

言珪尚少姑試以僉書果可大用請俟他日帝曰不然
是家為國滅金滅宋盡死力者三世矣而可吝此耶拜
江淮行樞密副使大德三年遣珪巡行川陝還擢江南
行御史臺侍御史遷浙西肅政廉訪使劾罷郡長吏以
下三十餘人府吏胥徒數百徵贓巨萬計珪得監司奸
利事將發之行省不自安賂近臣妄言珪有厭勝事且

沮鹽法帝遣官雜治之得行省大小吏欺罔狀皆伏罪
拜江南行臺御史中丞因上疏極言天人之際災異之
故其目有修德行廣言路進君子退小人信賞必罰減
冗官節浮費以法祖宗成憲累數百言劾大官之不法
及近侍之熒惑者不報遂謝病歸武宗初召為太子詹
事辭不就尚書省立中外洵洵中丞久闕仁宗時在東
宮曰必欲得真中丞惟張珪可即日召拜仁宗將即位
廷臣用皇太后旨行大禮於隆福宮法駕已陳珪言當

御大明殿御史大夫止之曰議已定雖百奏無益珪曰
未始一奏詎知無益入奏帝悟移仗大明皇慶元年拜
樞密副使徽政院使寶勒們請以紅城軍隸興聖宮而
已領之以上旨移文樞密院衆恐懼承命珪執不署事
遂不行延祐二年拜中書平章政事請減煩冗還有司
以清政務得專修宰相職帝從之教坊使曹耀珠拜禮
部尚書珪曰伶人為宗伯何以示後世力諫止之皇太
后以中書右丞相特們德爾為太師萬戶布色參知行

省政事珪曰太師論道經邦特們德爾非其人布色無功不得為外執政車駕度居庸實勒們傳太后旨名珪切責杖之創甚輿歸京師明日遂出國門珪子景元掌符璽備宿衛至是以父病篤告歸帝驚曰來時卿父無恙景元頓首涕泣不敢言帝不懌進珪大司徒謝病家居至治二年英宗召見於易水上曰四世舊臣朕將昇卿以政珪辭歸丞相問曰宰相之體何先珪曰莫先於格君心莫急於廣言路是年為集賢大學士先是特們

德爾以私怨殺平章蕭拜珠御史中丞楊多爾濟上都
留守賀巴延大小之臣不能自保會地震風烈珪抗言
其寃復拜平章政事英宗遇弒逆黨夜入都門坐中書
堂矯制奪符印珪密疏言賊黨罪不可逭皆伏誅

按墓誌云

特實等自上都來夜叩國門徑入中書執符印衆莫知其端久之聞帝暴崩時魏王齊濟克圖以新王監省珪密撼之王意動因曰大統當在晉邸我有密書非王莫敢致王恐事洩珪曰事成王之功事敗我家甘糞粉不敢以言累王於是王遣人達其書晉王即位於龍居河罪人以次就戮及大駕至珪迎謁帝顧問曰此張平章耶密書之來良合朕意珪拜謝帝自探囊出片紙付翰林承旨庫春曰此當書之史蓋珪密書也本傳從畧

附識於此

特們德爾子索諾木議遠流珪曰於法強盜不分首從發冢傷尸者亦死索諾木從弒逆親斫丞相拜珠臂乃欲活之耶遂伏誅盜竊仁廟神主時參知政事瑪喇勒兼領太常禮儀使當遷左丞珪曰以參政遷左丞姑曰叙進而太常奉宗祏不謹當待罪而反遷官何以謝在天之靈命遂寢泰定元年車駕在上都帝以災異詔百官集議珪乃與樞密院御史臺翰林集賢兩院官極論當世得失與左右司員外郎宋文瓚詣上都奏之

所言弑逆未討姦惡未除忠憤未雪冤枉未理政令不信賞罰不公賦役不均財用不節凡數千言辭甚切至不報珪復進曰臣聞日食修德月食修刑應天以實不以文動民以行不以言刑政失平故天象應之惟陛下矜察允臣等議乞悉行之帝終不能從未幾珪病增劇詔常見免拜跪賜小車得乘至殿門下帝始開筵令珪領之珪進翰林學士吳澄等備顧問自是辭位甚力進封蔡國公別刻印以賜二年得旨暫歸明年帝遣使

名珪期於必見珪至帝曰卿來時民間如何對曰臣老
少賓客不能遠知真定保定河間臣鄉里也民饑甚朝
廷雖賑以金帛惠未及者十五六惟陛下念之帝惻然
敕有司畢賑拜翰林學士承旨知制誥兼修國史帝察
其真病命還家四年卒遺命上蔡國公印珪嘗自號曰
澹菴子六人

李孟字道復潞州上黨人父唐歷仕秦蜀因徙居漢中
孟生而敏悟七歲能文個儻有大志博學強記通貫經

史一時名人商挺王博文皆折行輩與交至元十四年
隨父入蜀行省辟為掾不赴後以事至京師中書右丞
楊吉達竒之薦于裕宗得召見東宮未及擢用成宗立
遣孟往陝西採訪先朝聖政備史官紀述孟討論編次
以進時武宗仁宗皆未出閣徽仁裕聖皇后求名儒輔
導有薦者曰布衣李孟有宰相才宜令為太子師傅大
德元年武宗撫軍北方仁宗留宮中孟日陳善言正道
多所裨益仁宗侍太后居懷州又如官山孟常單騎以

從在懷州四年誠節如一每進言曰堯舜之道孝悌而已矣今大兄在朔方大母有居外之憂殿下當迎奉意旨以娛樂之則孝悌之道皆得矣仁宗深納其言孟特善論事忠愛懇惻言之不厭而治天下之大經大法深切明白厥後仁宗入清內難敬事武皇篤孝母后端拱以成太平之功文物典章號為極盛實孟啟之也成宗崩安西王阿南達謀繼大統丞相哈喇哈斯密使來告仁宗疑而未行孟曰支子不嗣世祖之典訓也今宮車晏

駕大太子遠在萬里宗廟社稷危疑之秋殿下當奉大
母急還宮庭以折奸謀固人心不然國家安危未可保
也仁宗猶豫未決孟復進曰邪謀得成以一紙書召還
則殿下母子且不保豈暇論宗族乎仁宗懼然乃奉太
后還大都時哈喇哈斯稱病堅卧仁宗遣孟往問適成
后使者絡繹視疾孟入長揖而坐前引其手診其脈衆
以為醫乃不疑之既得知安西王謀立有日還告曰事
急矣先發者制人不可不早圖之左右皆不能決孟曰

羣邪違棄祖訓黨附中宮欲立庶子天命人心必皆弗
與殿下入造內庭以大義責之則凡知君臣之義者無
不捨彼為殿下用克清宮禁以迎大兄之至不亦可乎
且安西既正位號縱大太子至彼安肯退就藩國必將
鬪于國中生民塗炭宗社危矣危身以及其親非孝也
遣禍難於大兄非悌也得時弗為非智也臨機不斷無
勇也仗義而動事必萬全仁宗曰當以卜決之孟名卜
人語之曰大事待汝而決但言其吉乃入筮遇乾三五

皆九立而獻卦曰是謂乾之睽乾剛也睽外也以剛處外乃定內也君子乾乾行事也飛龍在天上治也輿曳牛掣其人形且劓內兌廢也厥宗噬膚往必濟也大君外至明相麗也乾而不乾事乃睽也剛運善斷無惑疑也孟曰筮不違人是謂大同時不可以失仁宗喜振袖而起乃共扶上馬孟及諸臣皆步從入自延春門哈喇哈斯自東掖來就之至殿廊收首謀及同惡者悉送獄奉御璽北迎武宗中外翕然隨以定仁宗監國使孟參知

政事孟損益庶務悉中利病遠近悅服然特抑絕僥倖
羣小多不樂事定言于仁宗曰執政大臣當自天子親
用今鑿輿在道孟未見顏色不敢冒當重任固辭弗許
遂逃去不知所之武宗即位有言于帝曰內難初定時
李孟嘗勸皇弟自取帝察其誣弗聽仁宗亦不敢復言
孟至大二年仁宗為皇太子嘗侍帝同太后內宴飲半
忽戚然改容帝顧語曰吾弟不樂何所思耶仁宗從容
起謝曰賴天地祖宗之靈神器有歸然成今日母子兄

弟之歡者李道復之功為多適有所思不自知其見於色也帝感其言命搜訪之得之許昌陘山召見于玉德殿帝指謂宰臣曰此皇祖妣命為朕賓師者宜速任之特授中書平章政事同知樞密院事仁宗嗣立真拜平章政事孟感知遇力以國事為己任嘗言人君之柄在賞與刑刑不足懲賞不足勸何以為治乃奏雪寃死者復其官蔭濫冒名爵者悉奪之罷僧道官天下稱快仁宗初出居懷州深見吏弊欲痛剷除之孟進言曰吏亦

有賢者在乎變化激厲之而已帝曰卿儒者宜與此曹
氣類不合而曲護如此真長者言卿在朕前惟舉人所
長而不斥其短尤朕所深嘉也時承平日久風俗奢靡
車服僭擬上下無章近臣恃恩求請無厭孟言貴賤有
章所以定民志賜與有節所以勸臣下請各為之限制
帝皆從之賜爵秦國公帝親授以印章又圖其像敕詞
臣為贊御書秋谷二字賜之嘗賜鈔十萬貫令將作監
治第孟辭曰臣布衣際遇所望於陛下者非富貴之謂

也悉辭不受皇慶元年請告歸墓事訖入朝帝慰勞其
至因請謝事優詔不允請益堅乃命以平章政事議中
書省事二年乞還國公印奏三上始如所請帝每與孟
論用人之方孟曰人材所出固非一途然漢唐宋金科
舉得人為盛今欲興天下之賢能以科舉取之猶勝於
多門而進然必先德行經術而後文辭乃可得真材也
帝深然其言決意行之延祐元年復拜平章政事二年
改封韓國公未幾以衰病乞歸田里帝不得已許之英

宗初特們德爾復相以孟前共政時不附已讒構于帝
盡收前後封拜制命降授集賢侍講學士度其必辭因
中宮之孟拜命欣然入院宣徽使以聞曰李孟今日供
職例當賜酒帝愕然曰李道復乃肯俯就集賢耶時特
們德爾子巴爾濟蘇侍帝側帝顧謂曰爾輩謂彼不肯
為是官今定何如由是讒不得行至治元年卒御史累
章辨其誣詔復原官進封魏國公謚文忠孟三入中書
民間利害知無不言退居一室蕭然如布衣凡獻納謀

議常自毀其藁家無幾存皇慶延祐之世每一政之繆人必以為特們德爾所為一令之善必歸之於孟馬子獻御史中丞同知經筵事

張養浩字希孟濟南人以才行徵為東平學政游京師獻書于平章博果察大奇之薦入御史臺一日病博果密親至其家問疾四顧壁立歎曰此真臺掾也選授堂邑尹毀淫祠三十餘所罷舊盜之朔望參者曰彼皆良民饑寒所迫不得已而為盜既加之以刑猶以盜目之

是絕其自新之路也衆感泣相戒曰毋負張公至大初
拜監察御史初議立尚書省養浩言其不便既立又言
變法亂政將禍天下臺臣抑不以聞乃揚言曰昔僧格
用事臺臣不言後幾不免今御史既言又不以聞臺將
安用時省臣得選用臺臣養浩歎曰尉專捕盜縱不稱
職使盜自選可乎遂疏時政萬餘言一曰賞賜太多二
曰刑禁太疎三曰名爵太輕四曰臺綱太弱五曰土木
太盛六曰號令太浮七曰偉門太多八曰風俗太靡九

願以崇儉慮遠為法以喜奢樂近為戒帝大怒既而喜
曰非張希孟不敢言即罷之以父老棄官歸養自是召
皆不起天歷二年關中大旱饑民相食特拜陝西行臺
中丞既聞命即散其家之所有與鄉里貧乏者登車就
道道經華山禱雨于嶽祠泣拜不能起天忽陰翳一雨
二日及到官復禱于社壇大雨水三尺禾黍自生秦人
大喜時斗米直十三緡民持鈔往糴稍昏即不用詣庫
換易則豪猾黨蔽易十與五累日不可得民大困乃檢

庫中未毀昏鈔文可驗者得一千八十五萬五千餘緡
悉以印記其背又刻十貫五貫為券給散貧乏命米商
視印記出糶詣庫驗數以易之於是吏弊不敢行又率
富民出粟因上章請行納粟補官之令聞民間有殺子
以奉母者為之大慟出私錢以濟之到官四月止宿公
署夜禱于天晝出賑饑未嘗少怠每一念至即撫膺痛
哭遂得疾卒闕中人哀之如失父母至順二年追封瀆

國公謚文忠

按李廷機大方通鑑云卷浩嘗著忠告集
三卷一曰廟堂忠告二曰風憲忠告三曰

收民忠告皆言居官之
道史傳不載附識于此

子彊引

敬儼字威卿其先河東人後徙易水父元長官至太常
博士儼嗜學善屬文御史中丞郭良弼薦為殿中知班
著憲章若干卷選充中書省掾朱清張瑄為海運萬戶
豪縱不法儼適典其文牘嘗致厚賂儼拒之二人伏誅
權貴多以賄連坐獨儼不與大德七年拜監察御史時
江浙行省與浙西憲司文章攻訐命儼偕阿爾斯蘭哈
雅往治議多不合兩上之朝廷卒是儼議至大元年擢

江南行御史臺治書侍御史先是儼以議立尚書省忤
宰臣意適兩淮鹽法久滯乃左遷為轉運使陰欲陷之
比至首劾場官之貪污者法既大行課復增羨至二十
五萬引河南行省參政來會鹽筴將定羨數為常額儼
以亭戶凋弊已甚病人以為已非大臣體遂止仁宗踐
阼名為戶部尚書廷議欲革尚書省弊政儼言遽罷錢
不用恐細民失利不從皇慶二年拜江西行省參政舊
俗民有爭即越訴于省吏得並緣為奸訟益繁儼令省

府非有司不得侵民訟事遂簡詔設科舉儼薦臨川吳澄金陵楊剛中為考試官得人為多延祐四年召為侍御史湖廣省臣以贓敗儼一日五奏卒正其罪臺臣有劾去而復職者御史復劾之章再上有旨命丞相樞密共決儼曰如是則臺事去矣遂即帝前奏黜之因伏殿上叩頭請代帝曰事非由汝汝其復位五年拜中書參知政事舊制諸院及寺監皆得奏除僚屬歲久多冒濫富民或以賂進儼以名爵當慎惜奏請悉追奪之明年

謝病歸徙居淮南泰定四年徵為集賢大學士商議中
書省事儼令使者先返而挈家歸易水與疾入見賜食
慰勞親為差吉日使視事命朝會無下拜旋進中書平
章政事天歷改元朝議欲盡戮朝臣之在上京者儼抗
言若輩皆循歲例從行殺之非罪衆賴以免居月餘傷
足告歸家居十餘年痺不能行猶劬書不廢卒封魯國
公謚文忠

欽定續通志卷四百八十九

欽定四庫全書

史部

欽定續通志卷四百

九十三

編修臣謝振定覆勘

總校官原任侍講臣王燕緒

欽定四庫全書

欽定續通志卷四百九十一

列傳

元四十四

梁曾

劉敏中

王約

王結

宋術

曹伯啓

李元禮

王壽

王倚

劉正

謝讓

韓若愚

趙師魯

劉德溫

尉遲德誠

秦起宗

梁曾字貢父燕京人少好學日記書數千言中統四年以翰林學士承旨王鶚薦辟中書左三部令史至元十六年累官知南陽府唐鄧二屬州為襄陽府所奪曾按圖經稽國制以聞得復舊南陽在宋末為邊鄙桑柘未成而歲賦絲民甚苦之曾請折輸布民始稱便十七年朝廷以安南國王

原文作安南世子按安南傳至元十四年光昌年國人立其世子日烜則

是時不當稱世
子矣謹據改

陳日烜不就徵選曾使其國進兵部尚

書與禮部尚書柴椿偕行明年日烜遣其叔遺愛奉表
從曾獻方物二十九年有旨再使安南授吏部尚書以
禮部郎中陳孚為副瀕行改授淮安路總管三十年至
安南其國有三門中曰陽明左曰日新右曰雲會陪臣
郊迎將由日新門入曾大怒曰奉詔不由中門是辱君
命也即回館卒從陽明門入又責世子日燁親出迎詔
且講新朝尚右禮以書往復者三具布天子威德而風

其主入朝日燂大感服

按安南國傳云梁曾使還日燂遣陪臣陶子奇來貢走臣以日

燂終不入朝議征之拘子奇於江陵則是日燂未嘗感服也本傳恐失其實

遣國相陶子奇

等從曾詣闕請罪曾還京入見進所與日燂往復議事

書帝大悅或讒曾受安南賂者帝以問曾曾對曰安南

黃金器幣奇物遺臣臣不受以屬陶子奇矣帝曰苟受

之何不可也敕乘傳之淮安任到官興學校勵風俗河

南行省事有疑者皆委曾議之大德元年除杭州路總

管戶口復者五萬二千四百戶請禁暮夜鞠囚游街酷

刑朝廷是之著為今九年歷拜雲南行省參知政事尋
召還京辭以母喪未葬扶柩北歸仁宗初起為集賢侍
講學士延祐元年奉詔代祀中岳還至汴以病寓居淮
南至治二年卒

劉敏中字端甫濟南章丘人幼卓異不凡年十三語其
父景石曰昔賢足於學而不求知豐於功而不自銜此
後人所弗逮也父奇之嘗與同儕各言其志曰自幼至
老相見無愧色乃吾志也至元十一年由中書掾擢兵

部主事拜監察御史僧格秉政敏中劾其姦邪不報遂
辭歸既而起為御史臺都事時同官王約以言去敏中
杜門稱疾臺臣請視事敏中曰使約無罪而被劾吾固
不當出誠有罪耶則我既為同僚又為交友不能諫止
亦不無過也久之遷翰林直學士兼國子祭酒大德七
年詔遣宣撫使巡行諸道敏中出使遼東守令恃貴倖
暴橫者一繩以法錦州雨水為災輒發廩賑之九年擢
集賢學士商議中書省事上疏陳十事曰整朝綱省庶

政進善良剔姦蠹顯公道杜私門廣恩澤實鈔法嚴武
備舉封贈武宗嗣位召至上京庶政多所更定加皇太
子贊善仍商議中書省事歷翰林學士承旨召公卿集
議弭災之道敏中疏列七事帝嘉納焉以疾還鄉里敏
中平生義不苟進進必有所匡救援據今古雍容不迫
為文理備辭明有中菴集二十五卷延祐五年卒追封
齊國公諡文簡

王約字彥博真定人至元十三年王磐薦為從事承旨

和爾果斯以司徒開府奏授翰林國史院編修官兼司
徒府掾二十四年拜監察御史時丞相僧格銜參政郭
佑為中丞時奏誅右丞盧世榮等誣以他罪約上章直
佑寬按治成都鹽運使王鼎不法罷其官轉御史臺都
事三十一年遷中書右司員外郎成宗即位言二十二
事曰實京師放差稅開獵禁蠲逋負賑窮獨停冗役禁
鷹房振風憲除宿蠹慰遠方却貢獻詢利病利農民勵
學校立義倉覈稅戶重名爵明賞罰擇守令汰官屬定

律令革兩司又請中書去繁文一取信於行省一責成於六部歷兵禮二部郎中請行贈諡之典以旌忠勲付時政記於史館以備纂錄立供需府以專供億皆從之拜翰林直學士知制誥同修國史高麗王昨年老傳國子諤有不安其政者飛讒離間及諫朝京師潛使人賂用事者留諤不遣詎復位乃委用小人厚斂淫刑國人羣愬於朝中書奏屬約驗問約至宣詔諭之

高麗國傳作遣山東

宣慰使塔齊爾刑部尚書王恭亨齋詔諭之

曰天地間至親者父子至重者

君臣彼小人知自利寧肯為汝家國地耶詎感泣謝願
奉表自雪且請子諫還國其黨與悉聽使者治約逮捕
覆按其罪命故臣洪子藩為相俾更弊政罷非道水驛
十三東民大喜尋除太常少卿詔讞獄京師釋無罪者
八十六人因議鬪毆殺人者宜減死一等著為令特拜
刑部尚書大德十一年仁宗自懷州入清宮禁以平章
賽音諤德齊安西王阿南達與左丞相阿固台謀逆命
刑曹按其狀約曰在法謀逆不待榜掠當伏誅獄遂定

至大二年仁宗在東宮擢為太子詹事丞四年立左衛
率府詔統侍衛軍萬人同列欲署軍官約持不可仁宗
召問約對曰皇太子事不敢不為天子事不敢為仁宗
悟即罷其議又命取安西兵器給宿衛士約謂詹事諤
勒哲曰詹事移文數千里取兵器人必驚疑主上聞之
奈何諤勒哲色慙曰實慮不及此家令薛居敬上言陝
西分地五事因被命往理之約不為署行曰太子潛龍
也當勿用之時為飛龍之事可乎遂止仁宗以詹事院

諸事循軌大喜諭羣臣曰事未經王彥博議者勿啟四年仁宗正位用陰陽家言欲御東宮之光天殿約言正

名定分當御大內太保入奏遂出御大明殿

按張珪傳載廷臣用

太皇后旨行大禮於隆福宮時珪為中丞言當御大明殿入奏帝悟移仗大明此云欲御光天殿又作太保入

奏未知孰是

拜約河南行省右丞會詔更錢鈔法今天下稅

盡收至大鈔約度河南歲用鈔七萬錠必致上供不給乃下諸州凡至大至元鈔參半用丞相布琳濟達贊之遣使白中書省臣遂徧行天下皇慶改元特拜集賢大

學士首奏河南行省丞相布琳濟達勲閱舊臣不宜久
外召入封河南王疏薦國子博士姚登孫應奉翰林文
字揭傒斯成都儒士楊靜請起復中山知府輔惟良前
尚書參議李源左司員外郎曹元用皆除擢有差延祐
二年奉使巡行燕南山東道使還拜樞密副使至治二
年以年七十致仕三年仍詔起集賢大學士商議中書
省事廷議罷征東省立三韓省約對曰高麗去京師四
千里地瘠民貧夷俗雜尚非中原比萬一梗化疲力治

之非幸事也不如守祖宗舊制丞相稱善議不行至順四年卒所著有史論及潛丘彙各三十卷高麗志四卷子思誠祕書監著作郎

王結字儀伯易州定興人幼聰穎嘗從太史董樸受經深於性命道德之蘊年二十餘游京師上執政書陳時政八事曰立經筵以養君德行仁政以結民心育英材以備貢舉擇守令以正銓衡敬賢士以厲名節革冗官以正職制辨章程以定民志務農桑以厚民生其言剴

切純正宰相不能盡用之仁宗在潛邸或薦結充宿衛
乃集歷代君臣行事善惡可為鑒戒者日陳於前大德
十一年命置東宮官屬以結為典牧太監近侍以俳優
進結言昔唐莊宗好此卒致禍敗殿下方育德春宮視
聽宜謹仁宗優納之及即位遷集賢直學士出為順德
路總管教民務農興學孝親弟長戢姦禁暴悉登於書
俾朝夕閱習之屬邑巨鹿沙河有唐魏徵宋璟墓乃祀
二公於學表其言論風旨以勵多士繼調東昌路境有

黃河故道而會通堤遏其下流夏月潦水壞民麥禾結
疏為斗門以泄之民獲其利至治二年召拜參議中書
省事時拜珠為丞相結言為相之道當正己以正君正
君以正天下除惡不可猶豫猶豫恐生它變服用不可
奢僭奢僭則害及於身丞相是其言未幾除吏部尚書
泰定元年遷集賢侍讀學士會有月食地震風烈之異
結言朝廷君子小人混淆刑政不明官賞太濫故陰陽
錯謬咎徵薦臻宜修政事以弭天變詔知經筵結援引

古訓證時政之失冀帝有所感悟中宮聞之亦召進講
結以故事辭天曆二年拜中書參知政事以親老辭是
時迎立明宗於朔方近侍有求除拜賞賚者結曰俟天
子至議之初上都之變失皇太子寶及更鑄新寶近侍
請視舊製宜加大結曰此寶當傳儲嗣不敢踰舊制也
近侍怒其異已譖詆日甚罷為集賢侍讀學士元統元
年召拜翰林學士知制誥同修國史與張起巖歐陽玄
修泰定天曆兩朝實錄拜中書左丞中宮命僧尼於慈福

殿作佛事已而殿災結言僧尼褻瀆所致當坐罪先時
有罪者北人則徙廣海南人則徙遼東去家萬里往往
道死結請更其法移鄉者止千里外改過聽還其鄉因
著為令職官坐罪者多從重科結曰古者刑不上大夫
今貪墨雖多然士之廉恥不可以不養也聞者謂其得
體至順二年卒四年追封太原郡公諡文忠著有易說
一卷詩文十五卷

宋術字弘道潞州長子人年十七避地襄陽已而北歸

屏居河內者十有五年趙璧經略河南聞其名禮聘之
中統三年擢翰林修撰至元六年高麗權臣林衍廢其
國王植而立其弟浟詔遣國王特訥克暨璧將兵討之
以衛為行省員外郎特詔徙江華島居民於平壤復命
慰勞良厚十三年遷太常少卿屬省官制行兼領籍田
署事十六年太子以耆德召見應對詳雅自是數蒙召
問侍講經幄開諭為多十九年太子以江西分地當署
郡邑守令皆命衛銓舉二十年初立詹事院首以衛為

太子賓客二十三年卒有秬山集十卷行世

曹伯啟字士開濟寧碭山人弱冠從東平李謙游篤於問學至元中歷任西臺御史關陝自許衡倡道學教多士伯啟請建祠立學以表其績四川廉訪僉事庫庫楚以苛刻聞伯啟糾黜之延祐元年升內臺都事遷刑部侍郎丞相特們德爾專政一日召刑曹官屬問曰西僧訟某之罪何為久弗治衆莫敢對伯啟從容言曰犯在赦前丞相雖甚怒莫之奪也八番帥擅殺起邊釁朝廷

己用帥代之矣命伯啟往詰其事次沅州道梗伯啟恐
兵往則彼驚將致亂乃遣史楊鵬單騎往喻新帥備得
其情止奏坐前帥擅興罪邊民以安大同宣慰使帕哈
哩鼎撲運嶺北糧歲數萬石肆為欺罔累贓鉅萬朝廷
遣使督徵率以賂免最後伯啟往其人已死喻其子曰
負官錢雖死必徵與其納賂於人曷若償之於官第條
汝父所賂之數官為徵之諸受賂者懼潛歸賂於其子
得鈔五百餘萬緡氏之逋負而無可理者即列上與免

之五年遷司農丞奉旨至江浙議鹽法罷檢校官置六倉於浙東西設運鹽官輸運有期出納有次船戶倉吏盜賣漏失有罰歸報著為令尋拜南臺治書侍御史因言揚清激濁屬在臺憲諸被枉赴愬者實則直之妄則加論可也今訟寃一切不問豈風紀定制乎俄去位英宗立召拜山北廉訪使時敕建西山佛宇甚亟御史觀音努等以歲饑請緩之近臣激怒上聽遂誅言者伯啟曰主上聰明睿斷是不可以不諍迺臺臣緘默使昭

代有殺諫臣名帝為之悚聽俄拜集賢學士御史臺侍
御史同修大元通制伯啟言五刑者刑異五等今黥杖
徒役於千里之外百無一生還者是一人身備五刑也
法當改丞相是之泰定初引年北歸優游鄉社矚人賢
之表所居為曹公里伯啟性莊肅奉身清約在中臺所
獎借多名士為侍讀學士考試國子首取呂思誠姚綬
雲南僉事范震言宰臣欺上罔下不報范飲恨死伯啟
具其事書於太史真州知州呂世英以剛直獲罪伯啟

白其枉進擢風憲其好彰善率類此天厯中起伯啟為
淮東廉訪使陝西諸道行御史臺中丞使驛敦迫伯啟
喟然曰吾年且八十尚忘知止之戒乎終不起至順三
年長子震亨卒於毗陵伯啟往拊之明年卒於道追封
魯郡公謚文貞有詩文十卷號漢泉漫藁續集三卷

李元禮字庭訓真定人資性莊重不妄言笑歷易州大
都路儒學教授遷太常博士定撰世祖及昭睿后裕宗
尊謚議其請謚圜丘升祔太室禮文多所詳定元貞元

年擢拜監察御史二年有旨建五臺山佛寺

成宗紀作元貞元年

事皇太后將臨幸元禮上疏曰伏見五臺創建寺宇土木既興工匠夫役不下數萬附近數路州縣供億煩重男女廢耕織百物踊貴民有不聊生者矣伏聞太后親臨五臺布施金幣廣資福利其不可行者有五時當盛夏禾稼方茂百姓歲計全仰秋成扈從經過千乘萬騎不無蹂躪一也太后春秋已高親勞聖體往復暑途數千里山川險惡不避風日萬一調養失宜悔將何及二

也陛下即位以來遵守祖宗成法正當兢業持盈之日
凡一舉動必書簡冊以貽萬世書而不法將焉用之三
也夫財非天降皆出於民今日支持調度百倍曩時勞
民傷財以奉土木四也佛以慈悲方便為教不與物競
雖窮天下珍玩奇寶供養不為喜雖無一物為獻亦不
為怒今太后欲為蒼生祈福福未獲而先勞聖體致天
子曠定省之禮軫思親之懷五也伏願中路回轅端居
深宮儉以養德靜以頤神上以循先皇后之懿範次以

盡聖天子之孝心下以慰元元之望如此則不祈福而
福至矣臺臣不敢以聞大德元年侍御史萬僧與御史
中丞崔或不合取前章封之入奏曰崔中丞私黨漢人
李御史大言謗佛帝大怒遣近臣齋其章敕右丞相諤
勒哲平章政事博果密等鞫問博果密以國語譯而讀
之諤勒哲曰其意正與吾同往吾嘗以此諫太后曰我
非喜建此寺蓋以先皇帝在時嘗許為之非汝所知也
博果密抗言曰他御史懼不肯言惟一御史敢言誠可

賞也遂入奏帝沉思良久曰御史言是也乃罷萬僧復

元禮職

按成宗記載大德元年佛寺成皇太后將親往
祈祝監察御史李元禮諫正之與傳所載互異

未幾改國子司業卒封隴西郡侯子端仕至禮部尚書

王壽字仁卿涿郡新城人幼穎敏嗜學長以通國字為

中書掾既而用朝臣薦入侍裕宗至元十九年授兵部

員外郎二十八年任吏部郎中以壻喀喇博果密柄用

即自免去明年授大司農丞不赴元貞二年出為燕南

河北道廉訪副使大德二年博果密為中執法復棄官

歸俄擢御史臺侍御史論事剴切六年召壽奉香江南
徧祠嶽鎮海漬使還具奏民之利病繫於官吏善惡宜
選公廉材幹存心愛物者專撫字剛方正大深識治體
者居風憲又嘗與臺臣奏宰相內統百官外均四海位
尊任重不可輕假非人世祖初置中書省以和爾布哈
塔齊爾錫津安圖巴延等為丞相史天澤劉秉忠廉希
憲許衡姚樞等實左右之當時稱治比唐貞觀之盛迨
至阿哈瑪特郝禎耿仁盧世榮僧格實都等壞法黷貨

流毒億兆近者阿固台巴延巴特瑪琳沁阿里等專政
煽惑中禁幾搖神器君子小人已試之驗較然如此臣
願推愛君思治之心邪正互陳成敗對舉庶幾上悟天
衷懲其既往知所進退天下之事可從而理也十年改
吏部尚書至大三年遷太子賓客集賢大學士卒贈薊
國公諡文正

王倚字輔臣其先東萊人也父永福金末避地徙燕為
宛平著姓倚為人孝友樂易重然諾與人交不苟合請

書務躬行不專事章句世祖選良家子入侍東宮時倚
年弱冠太保劉秉忠深器重之即以充選有詔皇太子
裁決天下事凡時政所急民瘼所繫倚知無不言是時
官職未備而湯沐分邑地廣事繁乃拜倚工部尚書行
本位下隨路民匠都總管至元二十一年詔立東宮官
屬以倚為家丞

按百官志至元十九年立詹事院二十
年置家令家丞本傳作二十一年互異

後以疾辭職仍給太子家丞祿以優養之倚上言不事
事而苟竊祿食臣心誠所未安力辭再四許之二十六

年皇孫出鎮懷孟帝為選老成練達舊臣護之乃以屬
倚陛辭帝目之良久謂侍臣曰倚修潔人也左右皇孫
得人矣及行營幕所在軍政肅然未幾召還二十八年
授禮部尚書以疾辭明年卒追封太原郡侯諡忠肅

劉正字清卿清州人初辟制國用使司令史遷戶部令
史至元八年罷諸路轉運司立局考核逋欠大都運司
負課銀五百餘錠逮繫倪運使等四人徵之視本路歲
入簿籍實無所負獄久不決正察其寃遍閱吏牘得至

元五年李介甫關領課銀文契七紙適合其數驗其字畫皆司庫辛德柔所書即白尚書捕鞠之辛具服盡償所負課銀四人得釋正由是知名轉樞密院令史辟掾中書十四年分省上都會諸王錫里濟叛至居庸關守者告前有警使姑退正曰職當進而退可乎馳出關抵上都邊將請黃白金符充戰賞中書檄工部造給未及上請帝怒其欺罔正曰軍賞貴速先造符而後稟命未見其罪也帝釋之十五年擢左司都事時阿哈瑪特當

國與江淮行省阿里布崔斌有隙誣以盜官糧四十萬命刑部尚書李子忠與正馳驛往按其事獄弗具阿哈瑪特復遣北京行省參政張澍等四人雜治之竟寘二

人於死

按世祖記及阿哈瑪特傳並作江淮行省平章政事阿里布左丞雅克特穆爾而不及崔斌與

本傳互異

正乃移疾還家阿哈瑪特敗逮正至坐以黨正曰

臣未嘗阿附惟法是從耳會日暮帝起還內俱械繫於闕東隙地踰數日復械繫於拱衛司和爾果斯曰上嘗謂劉正衣白衣行炭穴十年可謂廉潔者乃免歸二十

五年僧格既立尚書省擢為戶部侍郎升尚書嘗舉覈
河間鹽運官虧課事幾陷於罪乃移疾歸二十八年僧
格敗諤勒哲為丞相復擢為戶部尚書大德初累遷雲
南行省左丞時方議征緬正極言其不可不從師果無
功雲南歲輸金銀近中慶城邑戶口則詭稱逃亡甸寨
遠者則遣官領兵往徵人馬芻糧往返之費歲以萬計
徵收金銀之數必十加二而拆開之數又如之其送迎
饋贐亦如納官之數所遣者又以銅雜銀中納官正首

疏其弊給官稱俾土官詣官輸納其弊始革武宗即位
入為中書左丞二年懇辭還家仁宗初召諸老臣入議
國事正詣闕言八事曰守成憲重省臺辨邪正貴名爵
正官符開言路慎賞罰節財用詔集議行之累乞致仕
不許拜平章政事時議經理河南淮浙江西民田增茶
鹽課額正極言不可弗聽歲大旱臺臣言變理非人所
致平章李孟引咎乞罷平章和爾多卜丹曰臺臣不能
明察姦邪臧否時政可還詰之正言臺省一家當同心

獻替擇善而行豈容分異耶有旨廉訪司權太重故按
事失實自今不許專決六品以下官平章和爾多卜丹
李孟將議行之正言但當擇人法不可易也事遂寢延
祐六年卒封趙國公謚忠宣子秉德歷兵工二部侍郎
秉仁累官工部尚書

謝讓字仲和潁昌人幼穎悟好學國兵取宋立行中書
省於江西讓以選為令史調河間都轉鹽運司經歷擢
南臺御史舉湖廣行省平章政事哈喇哈斯達爾罕可

為御史大夫山東廉訪使陳天祥可為御史中丞右司員外郎高昉可任風憲劾江浙省臣聽詔不恭及不法事世祖遣使雜問既款服詔令讓與俱來人皆危之讓恬然若無事者臺綱大振大德間詔立陝西行御史臺以讓為都事凡御史封章及文移其可否一決於讓遷戶部員外郎時東勝雲豐等州民饑乞糶鄰郡憲司懼其販鬻為利閉其糶事聞於朝讓設法立禁閉糶者有罪三州之民賴以全活者甚衆歷湖廣行省左右司郎

中時廣西兩江岑雄黃聖許等屢相讐殺為邊患讓謂此曹第可懷柔不宜力競若舍中國有用之民爭炎荒不毛之地非長策也因書榜招諭以攜其黨俄調河南時江淮屯戍軍二十餘萬親王分鎮揚州皆以兩淮民稅給之不足則漕於湖廣江西是歲會計兩淮僅少三十萬石讓請以淮鹽三十萬引鬻之收其價鈔以給軍食不勞遠運公私便之至大元年轉戶部侍郎京倉主計吏以倉廩多踣漏久雨米壞請覆糠粃其上因雜揉

米中以給内外工人及宿衛者讓察其姦以彙結易之
奸弊悉除歷拜刑部尚書仁宗即位有旨六部事疑不
決者須讓共議而後聞刑部有案讓未署字而誤用印
吏懼遂私效讓署事覺度無損於事且憐吏以罪廢遂
視之曰吾署也其寬厚多類此讓上言古今有天下者
皆有律以輔治帝乃命中書省纂集典章以讓精律學
使為校正官朝廷以吏多滯事責曹按不如程者令下
讓曰刑獄非錢穀銓選之比寬以歲月尚慮失實豈可

律以常法乎由是刑曹獨得不責稽違拜陝西行省參知政事未幾拜西臺侍御史延祐四年卒於官追封陳留郡公謚憲穆子好古履實司提舉

韓若愚字希賢保定滿城人由武衛府史授通惠河道所都事開河有功歷遷中書左司都事時監燒昏鈔者欲取能名聚以所燒鈔為偽鈔使管庫者誣服獄既具若愚知其冤覆之得免死者十餘人遷刑部郎中改吏部仁宗即位故事凡潛邸官吏不次遷轉若愚以歲月

定其資品遂著為令皇慶元年遷刑部侍郎尋擢中書左司郎中時議禁民田獵犯者抵死若愚曰昔齊宣王之圍殺其麋鹿者如殺人之罪孟子非之遂輕其刑時參政曹鼎新辭職帝曰若效韓若愚廉勤足矣何用辭為繼命若愚參議中書省事特們德爾為右丞相以憎愛進退百官恨若愚不附已羅織以事帝知其枉不聽拜戶部尚書延祐六年復拜參議中書省事特們德爾復入相以舊憾誣若愚罪欲殺之帝不從復奏奪其官

除名歸鄉里泰定初命復其官歷侍御史時左丞相都
爾蘇擅威福以事誣侍御琳沁等下樞密獄無敢言其
寃若愚以計奏左丞相都爾蘇為右大夫事遂解三年
拜河南左丞會文宗平內難若愚畫策中機帝嘉之天
曆三年遷淮西北道廉訪使卒追封南陽郡公諡貞
肅

趙師魯字希顏霸州文安人父趾秘書少監師魯風采
端莊在太學力學如寒士延祐初為興文署丞後補中

書省掾於朝廷典章故實律令文法無不練習臨事明敏果斷執政奇之及典銓選平允無私人無不服泰定中拜監察御史時大禮未舉師魯言天子親祀郊廟所以通精誠迓福釐百王不易之典也宜鑒成憲講求故事對越以格純嘏帝嘉納焉元夕令出禁中命有司張燈山為樂師魯上言燕安怠惰肇荒淫之基奇巧珍玩發奢侈之端觀燈事雖微而縱耳目之欲則上累日月之明疏聞遽命罷之是時宰相都爾蘇密專命令不使

中外預知師魯又上言古之人君將有言也必先慮之於心咨之於衆決之於故老大臣然後斷然行之渙若汗不可反未有獨出柄臣之意不咨衆謀者也不報都爾蘇雖剛狠亦服其敢言朝士年未及致仕其子請預廢其官執政欲從之師魯駁其非事遂止天厯中遷樞密院判官持節治四川軍宣上威德士卒懷其恩信久之出為河間路轉運鹽使絕巡察之奸省州縣厨傳贈遺費竈戶商人無不便之歲課遂大增率僚吏新孔子

廟命吏往江右製雅樂聘工師春秋釋奠士論稱之以疾篤棄官歸京師至元三年卒封天水郡侯謚文清

劉德溫字純甫大興人歷任內宰司丞大德中奉中旨徵河南民逋糧德溫輒平其價令出鈔以償民甚便之復轉延福司丞奉旨代祀嶽瀆比還遷同知大都路總管府事輦轂之下供億浩繁德溫措置有法民用不擾累遷同知上都留守司事省檄和糴糧民以價不時得遞相觀望德溫下令曰糧入價出吏有敢為姦者罪之

於是糧不踰期而集俄授永平路總管永平當天厯兵革之餘野無居民德溫為政一年而戶口增倉廩實遂興學校以育人材庶事畢舉歲大旱禱而雨歲以不歉灑漆二水為害有司歲發民築堤德溫曰流亡始集而又役之是重困民也遂罷其役而水亦不復至有豪民武斷鄉里前吏莫敢治德溫按得其罪論如法書其過於門後竟以不道伏誅永平古孤竹國也國初郡守請於朝謚伯夷曰清惠叔齊曰仁惠為廟祀之而祀禮未

備德溫請命有司春秋具牢禮致祭從之著為式賜廟
額曰聖清士論題之至順四年封彭城郡侯謚清惠
尉遜德誠字信甫絳州人祖天澤任金為庫官郡王帶
孫拔絳州天澤被俘投霍州御衣局人匠總管父鼎仕
至潞州知州德誠歷官太子率更丞至大元年改詹事
院都事二年遷家令司丞仁宗見其謹恪常令侍左右
數薦士出則未嘗語人選為河東山西道宣慰司同知
擊姦吏寬稅歛上計京師入見帝方食賜以餽餘擢陝

西行臺治書侍御史歷拜遼東道肅政廉訪使上疏言
事其略曰勞諸王以懷其心防出入以嚴宮禁立諫官
以遠讒佞崇科舉以求人材立常平以備凶荒汰僧道
以寬民力舉賢良以勵忠孝抑奢侈以厚風俗及拯鈔
法裁冗官等事未報而卒

秦起宗字元卿廣平深水縣人生長兵間學書無從得
紙父順削柳為簡寫以授之成誦削去更書年十七選
入蒙古學學輒成辟武衛譯史御史中丞塔齊爾愛其

才遷中臺史仁宗即位累遷太子家令司典簿官上言
東宮官屬輔導德義財賦非所治也朝廷是之遷南臺
御史建康多水或實災而有司抑之或無災而冒免起
宗微行得實人以為神明文宗初立命威順王征八番
時蜀省囊嘉特尚拒命起宗極言武昌重鎮當備上流
之師親王不可遠去力止之及王入見帝謂曰八番之
行非秦元卿幾為失計其後八番師還無敢擾於道路
者拜中臺御史劾中丞和尚受人婦女賤買縣官屋不

報起宗從臺官入見聽辯久之敕令起起宗不起會日暮出明日立太子有敕起宗又奏不罪和尚無以正國法和尚服辜帝曰為御史當如是矣又劾閩憲布扎爾竊父妾以逃其父憤死流之嶺南出為撫州路總管至官有司供帳甚盛問其費所從出小吏不敢隱曰借辦於民遂亟使歸之几席僅給而已僚佐有宴集成禮即止曰我素農家安儉約務清靜庶使吾民化之居一歲以老去官明年以兵部尚書致仕卒謚昭肅

欽定續通志卷四百九十